

**Govor predsjedatelja Zastupničkog doma Parlamentarne skupštine Bosne i Hercegovine dr. Denisa Zvizdića na sesiji “Europska unija kao garant stabilnosti, sigurnosti i napretka regije (i izvan regije)” na Konferenciji predsjednika parlamenata zemalja Europske unije
Brdo kod Kranja, 29. ožujak 2022.**

"Poštovane kolege i dragi prijatelji,

Dozvolite mi da istaknem nekoliko važnih činjenica u vezi sa mojom državom Bosnom i Hercegovinom.

Kao što znate, BiH geografski, historijski i kulturno pripada Evropi.

EU i NATO integracije su ključni prioriteti vanjske politike BiH koji nemaju alternativu.

Multietničnost i multikulturalnost, ravnopravnost naroda i jednakopravnost građana, antifašizam i izgradnja društva zajedničkih i evropskih vrijednosti su istinski kodovi BiH.

Mir, stabilnost, ekonomski prosperitet, vladavina prava i demokratski standardi su glavni ciljevi koje želimo da sačuvamo, etabliramo i unaprijedimo.

I možda najvažnije:

BiH je ključni faktor mira i stabilnosti na Zapadnom Balkanu.

U vezi sa aktuelnom situacijom, želim vas informisati da smo u periodu od 2015. do 2019. postigli značajan napredak na putu EU integracija i provođenju reformi, ali da smo, nažalost, zadnjih nekoliko mjeseci izloženi antiustavnim blokadama rada državnih institucija kao i opasnim secesionističkim idejama i namjerama.

Nosioci takvih antidemokratskih i antievropskih ideja su radikalno orijentisani političari koji ugrožavaju mir, stabilnost i evropsku budućnost BiH - i koji moraju biti sankcionisani i zaustavljeni.

Možda je demokratski svijet zakasnio sa preventivnim djelovanjem u Ukrajini - zato vas pozivam da ne zakasnimo sa preventivnim aktivnostima u cilju dalje stabilizacije i demokratizacije zemalja Zapadnog Balkana.

Poruka koju trebamo poslati mora biti jasna - Zapadni Balkan je zona interesa EU i evropskih transatlantskih partnera.

Zbog toga, BiH treba jasna evropska perspektiva i *Sui generis* pristup napretku na putu EU integracija.

To u ovome trenutku - kao važan korak naprijed baziran na kredibilnom napretku - znači dobivanje kandidatskog statusa.

To bi bio mali korak za EU, a veliki i značajan za BiH.

I to bi bila najbolja poruka građanima BiH - a prema zadnjim anketama skoro 80 posto građana želi vidjeti BiH u EU .

I na kraju, želim da mi vjerujete da bi odluka o ubrzanom prijemu BiH u EU bila upisana u historiju Evrope kao mudra i strateška odluka koja će donijeti zasluženi i trajni mir i prosperitet mojoj državi, ali i Zapadnom Balkanu i čitavoj jugoistočnoj Evropi.

Hvala na pažnji."